

ISUMALIUTISSIISUT

Sanaartornermut ataatsimiititaliamit tunniunneqartoq.

Pineqarpoq;

**Soraarnerussutisiallit pissakinnerit nammineq inigisaminniittut illuminnut 100.000 kr.-
it angullugit aserfallatsaaliinissanut pisariaqartunut tigusaqarnissaannik periarfis-
sinneqarnissaannut Naalakkersuisut upernaakkut 2016-imi ataatsimiinnissamut
inatsisissamik saqqummiinissaannik Inatsisartut aalajangiiffigisassaattut siunnersuut.
(Saaq. Inatsisartunut ilaasortaq Ane Hansen, Inuit Ataqatigiit)**

Siunnersuutip aappassaaneernissaanut tunniunneqartoq

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Anders Olsen, Siumut, Siulittaasoq
Inatsisartunut ilaasortaq Kalistat Lund, Inuit Ataqatigiit, Siulittaasup tullia
Inatsisartunut ilaasortaq Jens-Erik Kirkegaard, Siumut
Inatsisartunut ilaasortaq Ane Hansen, Inuit Ataqatigiit
Inatsisartunut ilaasortaq Justus Hansen, Demokraatit

UKA 2015-ip ingerlanerani ull. 4. november siullermeerereermermi siunnersuut
Ataatsimiititaliap misissorpaa.

Siunnersuutip imaa siunertaalu

Soraarnerussutisiallit/utoqqalinersiallit pissakinnerit namminerisaminnik illullit
sivisunerusumik illuminniiginnarnissaannut pitsaanagerusumik periarfissinnissaat
siunnersuutikkut siunertarineqarpoq. Kiisalu siunnersuut suliffissaqartitsinerup
annertusinissaanik imaqarpoq.

Siunnersuutip Inatsisartuni siullermeerneqarnera

Siunnersuut Inatsisartunit assigiinngitsunik isummorsorfigineqarpoq,
amerlanerussuteqarluartullu sammisaaq Ataatsimiititaliamit suliarineqaqqaat.

Ataatsimiititaliap siunnersuummik suliaqarnera

Suliereqquneqartoq Ataatsimiititaliap suliaraa, isumaqarlunilu innuttaasut inissialiornermut tapiissutisillutik illuutillit tapiissutisinatillu illuutillit akornanni maanna annertuumik assigiinngisitsisoqartoq. Taamatutaaq inissialiornermut tapiiffigineqarlutik illuutillit taarsigassarsiaminnik taarsiisimasut iluutillillu taarsigassarsiaminnik taarsiisimangitsut assigiinngitsunik atugassaqartinneqartarput.

Innuttaasut inuunerminnik namminerlu illuminnik sapinngisaq malillugu namminneq isumaginnissaannut isuma Ataatsimiititaliap tunngaviatigut ajunngitsuusoraa. Taamatutaaq innuttaasut imaaliallaannaq imminnut isumagisinnaangitsut ikiorserneqartarnissaat Ataatsimiititaliap ajunngitsutut isumaqarfigaa. Taamaattorli aalajangiiffigisassatut siunnersuummut saqqummiunneqartumut Ilaqutariinnermut, Naligiissitaanermut Isumaginninnermullu Naalakkersuisup akissuteqarnera aamma Ineqarnermut, Sanaartornermut Attaveqarnermullu Naalakkersuisup akissuteqannginnera Ataatsimiititaliap eqqumiigaa, siunnersuummimi inissialiornermut tapiissutisillutik illuutilinnut aaqqissuussineq maanna atuuttoq naalakkersuisullu kingulliup taasap naalakkersuisoqarfianit susassaqarfigineqartoq innersuussutigineqarmat.

Siunnersuut una isumaginninnikkut isumannaarinissamat aaqqissuussinernut atuuttunut – soorlu ineqarnermut tapiissutinik aaqqissuussinernut – ilassutitut isigineqarnissaanik Naalakkersuisut isumaqarnerat Ataatsimiititaliap isumaqatiginngilaa. Siunnersuut innuttaasunut namminerisaminnik illuutilinnut taarsigassarsisitsisarnermik aaqqissuussinernut atuuttunut ilassutissatut Sanaartornermut ataatsimiititaliap isumaqarfigaa.

Tamanna ikorfartorniarlugu isumaginninnermut inatsiseqarneq pillugu Sanaartornermut ataatsimiititaliaq paasiniaasimavoq, paasisimallugulu aningaasartuutitut tassanngaannaq pilertunut taamaallaat maanna tapiisoqarsinnaasoq, siunnersuummilu saqqummiunneqartumi tamanna tunngavigineqanngitsaq. Siunnersuummi uani aserfallatsaaliinernut pilersaarutigineqartunut soraarnerussutisiallit/utoqqalinersiallit pissakinnerusut namminneq akiliinissaminnut periarfissaqarfiginngisaannut tapersersiisarnissaq siunertarineqarpoq.

Sanaartornermut ataatsimiititaliaq isumaqarpoq, siunnersuut akuerineqassappat tapiissutitut pineqartunut piumasaqaasiortoqartariaqartoq.

Illumi avatangiisitigut nukimmilluunniit atuinermik pitsanngorsaatit, oqorsaatit il.il. sivilisunerusumik attanneqarsinnaanerannut piumasaqaataasinnaasunut assersuusiortoqarsinnaavoq, taamaalillunilu pineqanngillat sanaartukkap atugaaneranut piumasaqaatit. Eqqarsaataasinnaavortaaq tapiissutit taarsigassarsiatut ernialersugaanngitsutut akilersugassaannngitsutullu tunniunneqartarnissaat, taakkulu pigisap aalaakkaasup

qularnaveeqqusiunneqarneratigut tunniunneqartassasut, tassungalu atatillugu pigisap aalaakkaasup ikuallattoornissamut sillimmaserneqarneranut kinguaattoortoqarsimannginneranik kiisalu illumik piginnittoq pisortanut akiitsunik akiligassiissutinik kinguaattoorsimannginneranik uppersaasiinissamik piumasagaateqartoqarsinnaasoq. Realkreditimit imaluunniit aningaaserivimmit piumasagaatit nalinginnaasut tunnagvigalugit taarsigassarsisoqarsinnaannginnerani, aatsaat erniaqanngitsumik taarsersugassaanngitsumillu taarsigassarsiat tunniunneqarsinnaasariaqarput.

Siunnersuuteqartoq siunnersuummini ima tunngavilersuivoq:

” Innuttaqatigut taaneqartut aningaasanik tigusaqarnissamik periarfissinnerisigut angerlarsimaffiit naammaginartunik aserfallatsaalineqarnissanik pisariaqartunik akissaqalernissaanik periarfississavagut, kiisalu sumiiffinni ingerlatsiviit sanasut assigisaallu minnerit suliassanik annertunnginnerusunik suliaqarnissaanik periarfississavagut, suliassat allatigut suliarineqarsinnaassanngikkaluit.”

Tassunga atatillugu Sanaartornermut ataatsimiititaliap oqaatigerusuppa, siunnersuutip piviusunngorneratigut aningaasaliissutigineqartut sanaartortut akissarsiaannut atortussanullu atorneqartarnissaat naatsorsuutigineqartoq, taamaalillutillu atugassiissutinut sivisuumik attaneqarsinnaasunut toqqaanartumik atorneqarsinnaassasut. Taakkulu avatangiisitigut nukimillu atuinermik pitsanngorsaait, oqorsaait il.il. pillugit piumasagaatit siuliani taasat innuttaasunut pineqartunut sivisuumik nuannaarutaasinnaassasut, suliffissaqartitsinermullu pitsaasumik sunniuteqarumaassasut.

Siunnersuutip aningaasatigut kingunissai

Inatsisartut suleriaasianni § 33, imm. 1-imi allassimavoq, aalajangiiffigisassatut siunnersuut tunngavilersugaassasoq, aalajangiiffigisassatullu siunnersuutip piviusunngornerani aningaasatigut allaffissornikkullu kingunerisassai allaaserineqarsimassasut.

Ataatsimiititaliap maluginiarpaa, tamanna naapertorlugu siunnersuutip piviusunngornerani aningaasatigut kingunissai siunnersuummi allaaserineqarsimasut, taamaalilluni aaqqissuussinerup ukiuani siullermi misiliutissatut 5 mio. kr.-t aningaasaliissutaassasut. Tamatumunnga ilanngullugit allaffissornikkut aningaasartuutit ukiumoortumik missingerneqarput 0,5 mio. kr.-iussasut. Tamatumani oqaatigineqassaaq tapiissutitut aningaasaliissutit taamaallaat akiligassiinikkut akiliutigineqarsinnaassammata, taamaalillunilu pissutsit siuliani pineqartut, akissarsianillu akileraarutit akilerneqarnissaat isumannaarneqassallutik. Aningaasartuutit inatsisissatut siunnersuutip suliarineqarneranut missingerlugu ukiup affaani suliarineqassasoq naatsorsuutigineqarpoq, taakkulu suliassanik pineqartunik suliassaarfimmit missingersuusianit matussuserneqassasut.

Ataatsimiititaliap inassutaa

Siunnersuutip qanoq paasineqarnissaa pillugu siuliani oqaaseqaatit tunngavigalugit siunnersuut akuerineqassasoq **Ataatsimiititaliap isumaqatigiittup inassutigaa.**

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappasaaniigassanngortippaa

Anders Olsen, Siulittaasoq

Kalistat Lund,
Siulittaasup tullia

Jens-Erik Kirkegaard

Justus Hansen

Ane Hansen